

[Augsburg], 6. Februar 1571

An Theodor Zwinger

UB Basel, Fr. Gr. I 11, fol. 332r.

S. Vbi rerum testimonia adsunt, inquit ille, quid opus est verbis? Ego, Mi Clariss[ime] et chariss[ime] D. Doctor, tuum mei studium, summamque benevolentiam, cum fructu meo haud paenitendo, tot tanque euidentib[us] argumentis sum expertus, vt ex animo optem, occasionem mihi dari aliquam, tibi optatam, grati erga te et tuos animi declarandi. Qua profecto vtar προθυμότατα. Amphitheatum tuum iam tandem exaedificatum esse, et tibi, grauissimis laboribus defuncto, et reipub[licae] literariae graturlor. De Demosthene, gratias ago deo opt[imo] huc usque perducto. Spero et caetera fore, si non optima, at tolerabilia. idque mihi satis est. Typographorum, si tua solerti et fideli opera carere possunt, modestiam laudo: δοξοσοφίαν, si qua est, corrigere non possum. Penes me fuit, dare operam, vt opus hoc quām emendatissimum ederetur. Euentum typographiae, longè absens, et iudicia lectorum varia, saepè imperita et inuida, aequi bonique facere cogor. Gloriolam, si qua erit, neque aspernabor, et, si nulla erit, non magnopere desiderabo: τὰ ἄνω μᾶλλον ἢ τὰ κάτω μελετῶν, καὶ τὸν ἔσχατον χιτῶνα τῆς κενοδοξίας, καθὰ πλάτων φησὶν, ἐκδύσασθαι προθυμούμενος. Interim tamen τῷ καιρῷ δουλεύειν ἀνάγκη. Scripsi iam bis ad te de gnomologia mea Isocratica, Demosthenicae haud absimili: sed literas animaduerto, quod earum nullam mentionem facis, intercidisse. Res autem ita se habet. Etsi id opusculum ad Isocratem nihil attinet: tamen, quia Isocratis nomen habet, veritus, ne Oporiniani iniuriam sibi fieri per iniuriam quererentur: id eis bis obtuli, nullo responso me dignatis, et, vt audio ex nostratis bibliopolis, auaritiae me accusantibus: à quo criminе, vt nihil aliud, saltem paupertas me vindicat. Quod cum ita sit: idem opusculum Episcopio nostro obtuli. Sed cum is Demosthenem alteri excudendum tradiderit: quid de hoc libello sperem? Oporinianos tertium appellare non est meum: et si expeterent, non traderem, nisi accepta syngrapha, qua se et in singulos terniones singulos florinos, et 20 exempla datus, et lucubratiunculam eam qualemcunque, laboriosam tamen, nec, vt spero, adolescentulis inutilem, sub autumnum huius anni 71. se edituros promitterent. Confugio igitur rursus ad humanitatem et beneficentiam tuam, tanquam sacram ancoram, tuumque prudens consilium, cum hoc Augustano γραμματοφόρῳ <...> potius Friburgensi Walhio (si is nondum discesserit) expecto. Vale. Postridie Nonas Februarij 1571.

Hiero[nymus] Wolfius
tuo merito tui
studiosiss[imus] et amantiss[imus].